

十二遊經

東晉沙門迦留陀伽譯

昔阿僧祇劫時菩薩爲國王其父母早喪亡
讓國持與弟捨國行求學道遙見一婆羅門
姓瞿曇菩薩因從婆羅門學道婆羅門答菩
薩言解體所著王者衣服編髮結莎爲衣如
吾所服受吾瞿曇姓於是菩薩受服衣被體
瞿曇姓潔志入於深山林藪險阻坐禪念道
婆羅門言卿是王者久在尊貴簡於勤苦夏
可飲水食衆果諒冬可還城邑街里乞食還
其樹下禪思勿毀菩薩其所乞食還其國界
舉國王者下及庶民無能識菩薩者謂以爲
小瞿曇菩薩於城外甘果園中以作精舍於
中獨坐時國中五百大賊劫取官物逃走路
由菩薩廬邊蹤跡放散遺物在菩薩舍之左

右明日捕賊追尋賊者蹤跡在菩薩舍下因
收菩薩便將上問謂爲菩薩國中大賊前後
劫盜罪有過死王便勅臣下如此之人法應
以木貫身立爲大標其身血出流下於地是
大瞿曇在於山中以天眼徹視見之便以神
足飛來問之子有何罪其痛酷乃爾乎瘡豈
不傷毒忍苦若斯菩薩答曰外有瘡痛內懷
慈心不知何罪橫見誅害大瞿曇言卿無子
姪當何繼嗣忍痛如此菩薩答言命在須臾
何陳子孫於是國王使左右以彊弩飛箭射
而殺之大瞿曇悲哀涕泣下其屍喪棺殮之
於是取土中餘血以泥團之各取左右持著
山中還其精舍左面血著左器中其右亦然
大瞿曇言子是道士若其至誠天神當使血
化成人却後十月左即成男右即成女於是

便姓瞿曇氏一名金夷仁賢劫來始爲寶如
來釋迦越壽五百萬歲自下二十五王其壽
三百萬歲文陀竭正壽百萬歲頂生王遮迦
越左髀右髀王皆壽十萬歲從歡喜王諸王
皆壽八萬四千歲從惡念遮迦越殺一牛祠
祀害命失金輪得銀輪主三天下壽萬歲堅
念王作鐵壽五千歲得銅輪主二天下主西
南喜殺王壽二千五百歲得鐵輪主南天下
其王有太子行五惡殺一滅壽千歲古人有
九病寒熱飢渴生老病死婆羅門殺生祠祀
從是生四百四病從師子念王人壽轉滅壽
百二十歲從師子念王後師子意王有八十
四王人命減或壽八十七五十三二十
十歲者於是後有師子命車王名白淨是菩
薩父計菩薩身終始并前後八萬四千遮迦

越王名瞿曇氏純熟之姓菩薩在兜術天上
意欲下生觀於天下誰國可生言惟白淨王
家可生身於是天上有樹名兜曇樹菩薩退
坐他樹下思惟其本樹無復精光於是有天
問言菩薩何緣捨本常坐就他樹坐有天子
知菩薩意答天言卿不知耶今者菩薩欲下
生閻浮利觀何國可生惟白淨家可生於是
諸天皆言今菩薩下生當何以贈送各設方
計言惟淨明天上四百四寶奇鏤別異各有
名類同有寶華以爲車乘伊羅慢龍王以爲
制乘名白象其毛羽踰於白雪山之白象有
二十三頭頭有七牙一牙上有七池池上有
七優鉢蓮華一華上有一王女菩薩與八萬
四千天子乘白象寶車來下時白淨王夫人
中寐見白象騁騁寐寤惕驚寤以告王菩薩

父名白淨其父兄弟四人白淨王有二子其
大名悉達其小子名難陀菩薩母名摩耶難
陀母名瞿曇彌菩薩叔父名甘露淨王亦有
二子長子名調達小子名阿難菩薩中叔名
穀淨王有二子大子名釋摩納小子阿那律
菩薩小叔名設淨王有二子大子名釋迦王
小子名釋少王迦惟羅閱國有八城合有九
百萬戶調達以四月七日生佛以四月八日
生佛弟難陀以四月九日生阿難以四月十
日生調達身長丈五十四寸佛身長丈六尺難
陀身長丈五十四寸阿難身長丈五十三寸其貴
姓舍夷長一丈四尺其餘國皆長丈三尺菩
薩外家去城八百里姓瞿曇氏作小王主百
萬戶名一億王菩薩婦家姓瞿曇氏舍夷長
者名水光其婦母名月女有一城居近其邊

生女之時日將欲沒餘明照其家室內皆明
因字之爲瞿夷此言瞿夷者是太子第一夫
人其父名水光長者太子第二夫人生羅云
者名邪惟檀其父名移施移施長者第三夫
人名鹿野其父名釋長者以有三婦故太子
父王爲立三時殿殿有二萬采女三殿凡有
六萬采女以太子當作遮迦越王故置有六
萬采女佛以二十九出家以三十五得道從
四月八日至七月十五日坐樹下爲一年二
年於鹿野園中爲阿若拘隣等說法復爲畢
婆般等說法復爲迦者羅等十七人說法復
爲大十長者及二才念優婆夷說法復爲正
念尼捷說法復爲提和竭羅佛時四十二人
說法三年爲鬱爲迦葉兄弟三人說法滿十
比丘四年象頭山上爲龍鬼神說法五年於

竹園中爲私呵味說法五年去未至舍衛時
舍利弗作婆羅門有百二十五弟子坐一樹
下時目連爲彌夷羅國中作丞相將軍出行
見舍利弗坐樹下便問舍利弗何爲在此坐
舍利弗答言吾欲學道目連言願以君爲伴
即遣百官羣臣還去唯留百二十五人合有
二百五十人舍利弗入城分衛見佛弟子馬
師比丘問之爲何道士衣服不與常同馬師
比丘答言吾是佛弟子舍利弗問言佛云何
說法馬師言諸法從因緣滅諸苦盡滅於是
舍利弗便得須陀洹道歡喜便還報目連言
世間有神人目連言云何說法舍利弗具說
本末目連便復得須陀洹道二人便相持及
弟子至佛所未至佛已預知便告比丘言今
當有二賢士一人名智慧比丘一人名神足

比丘須臾來到佛爲說四諦舍利弗七日得
阿羅漢目連以十五日得阿羅漢六年須達
與太子祇共爲佛作精舍作十二佛圖寺七
十二講堂三千六百間屋五樓閣七年拘耶
尼國爲婆陀和菩薩等八人說般舟經八年
在柳山中爲屯真陀羅王弟說法九年穢澤
山爲陀崛摩說法十年還摩竭國爲弗迦沙
王說法十一年恐懼樹下爲彌勒說本起十
二年還父王國爲釋氏精廬去城八十里爲
差摩竭說法還國爲父王及釋迦種說法度
八萬四千人得須陀洹道是十四國佛十二
年於中遊化說法波斯匿王此言和悅迦惟羅越
此言妙德舍衛國者此言無不有維耶離國者此言廣大一
名度生死羅闍祇者此言舍城鳩留國者此言智士
國波羅奈者此言鹿野一名諸佛國閻浮提中有

十六大國八萬四千城有八國王四天子東
有晉天子人民熾盛南有天竺國天子土地
地多名象西有大秦國天子土地饒金銀璧
玉西北有月支天子土地多好馬八萬四千
城中六千四百種人萬種音響五十六萬億
垺聚魚有六千四百種鳥有四千五百種獸
有二千四百種樹有萬種草有八千種雜藥
七百四十種雜香四十三種寶有百二十一
種正寶七種海中有二千五百國百八十國
嗽五穀三百三十國嗽魚鼈龜鼉五國王一
王主五百城第一王名斯黎國土地盡事佛
不事衆邪第二王名迦羅土地出七寶第三
王名不羅土地出四十二種香及白瑠璃第
四王名闍耶土地出蓴菜胡椒第五王名那
頰土地出白珠及七色瑠璃五大國城人多

黑短小相去六十五萬里從是但有海水無
有人民去鐵圍山百四十萬里

十二遊經

蛸迂玄切蜚飛字蠕音軟眇尺之切聃音頂瞍刀頂切
嚙呼獲切殄力殄切惕音剔